



Jumat, 01 September 2023

Ogen: Amos 8:1-3



“Ndenden Jadi Tangis Ngandung”



Kejahatan: ngerampas hak-hak anak melumang bage pe diberu balu-baluh, rukur kerna erbahan sila uli; kerina enda perbahanen e si la ngena ate Dibata. Bangsa Israel i bas perdalanen geluhna megati erbahan si la ngena ate Dibata. Nabi Amos mpersingeti sieme kerna ngerampas hak-hak anak melumang ras diberu balu-baluh bage pe kerna aturen-aturen agama si idalanken alu pekulah-kulah. Bangsa enda meteh aturen-aturen tapi usurka ngelanggar aturen-aturen e. Nandangi bangsa e aturen agama entah pe erbahan persembahen man Dibata terjengeng gelah iidah kalak sikap dengen mehuli. Megati kel isingetken gelah bangsa Israel erbahan aturen entah ersembah la terjeng pekulah-kulah. Melala persembahen tapi ciga ate Dibata.

Bahan renungen wari enda pe, tangkas isingetken Dibata erkelang-kelangen nabiNa. Dibata nungkun man nabi Amos kerna kai antusen pengenehenen si idah nabi Amos. Antusen e nuriken kerna ukumen sinandangi ibereken Dibata man bangsa e. *"I bas wari e ende-enden i bas istana salih jadi sora tangis ngandung. I jah i je merap bangke jelma. Bangke-bangke e ibenterken ndarat alu sinik-sinik"*. Ukumen e isehken gelah bangsa Israel banci robah dengen jera arah lagu langkah dengen perbahanen si la payo i adep-adepen Dibata.

Keriahen isalihken Dibata jadi tangis ngandung erkiteken pengelegi bangsaNa. Bangsa si la mediate, bangsa si la megiken Kata Dibata, bangsa si ngaloken ukumen. Selaku moria, kita pe megati la ngikutken pedah Dibata, gelah ula kita ndatken ukumen, tetaplah kita i bas perbahanen ras lagu Langkah singena ate Dibata.